

四庫全書

集部

欽定四庫全書

集部

石倉歷代詩選卷四百五十六

詳校官右中允臣薩敏

侍讀臣孫球覆勘

總校官進士臣朱鈴

校對官中書臣汪學金

賸錄監生臣鈞福

欽定四庫全書

石倉歷代詩選卷四百五十六

明 曹學佺 編

明詩次集九十

朱應登

雨雪曲

行道廣且深  
霏雪何飄颻  
晨風無終極  
烈烈吹我裳  
長冰斷四澤  
瀨景瀰八荒  
遙曠達周原  
廓哉無何鄉  
迫觀

古巖側磧路如羊腸獵人携犬至窮獸走彷徨僕饑委  
道蹶馬疲不能行戍旗動高隧云是甸子岡超驥愧局  
步躑躅徒自傷

贈劉元瑞守紹興

朝出承明廬駕言還故鄉當門結旌旆觀者倍生光故  
人欣再見眷眷意難忘舉觴承湛露頌德詠羔羊周官  
十二牧職貢各殊疆持子夙夜心坐致黎庶康深衷豈  
念此但感別日長相彼水中鳧羽翼同翱翔風波一失

所望望徒心傷

滸西山庄留別康脩撰海

滸西渺何極乃在南山陲太白交參互雍原相蔽虧微  
春發膏潤庶品含榮熙靈光凝遐矚灑景暢玄思念子  
薄時好懷芬與世遺金闈謝時彥丹壑斂英姿大道本  
昭曠上聖或居夷蹇予重行役瞻彼寫襟期臨觴詎能  
已為情良在斯淹淹日復夕去去從此辭一別起萬想  
孤悰悵中達願言抗高軌為國揚令儀

立秋後一日過興隆次韻書懷

辭家方首夏奄忽臨秋期行役良孔艱運序一再移那  
能不夙夜行露多嶽峨緬邈親之廬阻絕天一涯心隨  
落日遠目與飛雲馳四月之一書何以慰遐思湖田亦  
粗給歲計無厚基秋稼儻有獲尚可豐華滋私言秉昭  
曠生產非所治

夢大復何子

京華一云別譬如紛飛翼遙南中道念子無消息歲

徂寒暑變日落風雨黑詎知萬里魂能達君子側篇章  
煩見示觸目見古色瀏瀏清瀨鳴擢擢朱絃直指擿發  
雋語要我以終極大質多渾成至寶去雕飾晤語忽復  
竟驚起謝良德音撤猶若聞轉盼已難即悵悵牽垂帷  
仰睇梁月色何由託歸鴻附此長相憶

贈別蔣子雲

羈心夜不寐懷里念前途明時悼遷斥末路紛憂虞秋  
湍積廣峴初曜開晴湖諸禽相哀鳴似亦憐其徒弭子

南泛楫為余傾一壺壺傾復淹滯執手野躋躇子夙負  
耿介懷寶適名都摛詞悲寡和守道謝羣趨忽諫長楊  
獵甘伏東市誅運違大道隱事躡神理徂皇靈幸廻  
捲死草氣復蘇已稅金陵駕尚挽幕中符官閑足休懈  
室邇遂懽愉遠績不在小寧子千金軀

進舟廣洋湖宿村舍

理棹出林樾繫纜息溪濱平疇寓耳目彌望披烟雲秋  
卉具以腓時景氣猶芬歸栖得故墟拙疾負夙聞縕繾

盈尊酒斟酌生微醺長謝鸞鵠儔永託雁鷺羣回翔視  
蔚羅緯繡徒多文

沙子頭田居贈仲一丈飲酒

殘春餘幾日芳意暢心目君乘木蘭橈遠汎晴川綠問  
舍白鷺邊開軒青林曲三日轉一隅所至詢耕牧有客  
從外來斗酒相為開雀舫截魚膾鸞刀飛豹胎下箸羅  
庶羞一飲累百杯華登繼宵景漏盡未云迴君本伊管  
儔少壯樹宏達誤挂繒繳中遂令毛羽鏹河清聖人出

彙進茅俱拔忍使經濟才終困泥塗轄勸君飲美酒幽  
憤當見刷

何中丞四圖詩

肅事戎宵駕振衣辭國都王命有程期握手塞下符悠  
悠遠行邁忽忽歲月徂汾晉承飛蓋河隴遵前驅聖  
主重守邊買馬南禦胡千金大宛種五色渥洼駒沙苑  
開萬廩雲錦紛模糊豈云勤遠畧貴在防不虞委身狗  
臣節曷敢寧吾軀右職方奉使

大梁何峩峩跨上游羅衢分第宅驅轂富王侯煌  
煌紫薇省控據當嵩丘明公廊廟姿舉世寡所儕出牧  
蒞茲土日為蒼生謀巡方重民隱攬轡宣皇猷遂令宛  
洛間萬屋歸懷柔民居既奠枕河水亦安流邈矣皇華

篇千古詠咨諫

右藩省甸宣

王封出以乘國富馬可數所貴皇澤流物產自生聚偉  
哉太僕正實領九州圉行寺儼列星羣牧如環堵欵獻  
勤遠人廝養及編戶外以衛河湟入以實畿輔明公既

足足足明如素淵心豈專衛駟頌仍兼魯要在翊聖衷

匪徒事狂虜右太師考牧

迢迢黔中道乃在天一隅自昔靡漠鄉本與中國殊馬  
卿西喻蜀武侯南渡瀘遺聲落千載文教久自濡竭來  
苦凋瘵上下相矯誣奠夷為厲階黔首困豪輸嘵彼蓬  
髮人所至無完膚公今萬里往閭閻待昭蘇高調易絕  
絃急矢無完弧甘棠且先樹蕭艾宜後鋤政在寬嚴間

寒屋自回枯武侯何人斯豈謂非吾夫

右都憲巡撫

酬方思道以詩帙見寄

方子還山中兩度寄詩帙憐余方在疚報答百不一故人枉相存所恨越阡術江南十月交山中稼應畢天寒脆榆柳霜重熟棗栗理甕得舊醅攀崖割新蜜既可歡親顏亦堪悅家室吾翁嗟已晚念此重有失尚幸老母康甯以慰蓬篳人生歸有道貧賤匪所恤作詩謝同懷

商風振瑤瑟

為陸子齊題杏林春燕圖

長安三月黃鸝飛杏花如雪飄人衣  
陸郎二十擅文譽早向甘泉獻賦歸  
瓊林日高酒如乳意氣侵凌天尺五  
中坐賓僚列上公教坊細樂呈新譜  
君家慶澤葉流根父子相承更祖孫  
蟬聯七貴傳三葉儒雅風流在一門  
鶼鶼樓前瑞烟起朝回躍馬鳴珂里  
甲第還因主得名都人盡指官為氏  
君不見侍郎府前槐樹生中書省裏  
盤石平昭侯世擅江東美更有平原入洛京

海東神鳥詩贈張鵠舉

十年老鳳生海東一巢三雛各爭雄  
錦翰繡臆次第舉  
共入朝家羅網中太液池邊日初旦  
連翩上下聲相間  
一翔柏府凝神羊一集芝房伴朱雁就中少者猶知名  
慷慨三年始一鳴形庭誤聽伶倫竹碧落如聞子晉笙  
燕都二月青陽動棠花枝上參差弄姜被寒多夜未開  
謝池草發春先夢一門兄弟擅芳聲文采翩翩瑞聖明  
可憐韓子河陰道空感區區二鳥榮

戚里行

長安戚里盛樓臺羅衢夾巷絕浮埃雕軒綺戶排雲出  
却使飛鷹翻下來就中上貴椒房籍十八封侯門列戟  
有時清夜侍皇游監宮不敢詢踪跡連宗結黨氣象新  
等閑出入雙朱輪朝回戲獵宜春苑手挾彫弧閒射人  
昌國里中花滿烟乾寧驛前雲蔽天商船到岸不敢攏  
恐有家奴橫索錢英雄有時坐銷歇喬柯易瘁甘泉竭  
太陽初升光燭人不見明星與華月君看昔日景福宮

惟有楊柳搖春風

函谷關歌

朝出洛陽城暮投函關道函關日落行人稀滿目黃雲  
暗秋草此地古來西屬秦崩城敗壁猶嶙峋牛車冉冉  
行不盡更愁怪石摧車輪關門老子去已遠吾生學道  
嗟何晚紫氣猶經舊路迷青牛不見當時返只今豺虎  
正縱橫羽檄星馳大點兵徼巡司隸督責苦關下居民  
日夕驚踴林漸指新安麓夜火人歸茅店宿雞鳴客起

四散分令人忽憶孟嘗君

過分水嶺有懷同志

前歲南過分水關十月天晴花滿山今年西度分水嶺  
九秋積雪浮寒影天時南北有常運人事蹉跎發深省  
中原日夕狼虎多游子出門行荷戈魯儒樞衣蹈白刃  
汴京灑血腥黃河東橋作郡夷門裏南原卧家猶未起  
石亭抱璞隱城市急塘買田歸霅水有懷幽咄真自知  
海內論心竟誰是春日淮南黃歷留丁丁伐木聲相求

此時誰遣不歸去梁令還家尚黑頭

和西涯閣老寄題黃鶴樓韻兼呈

闕

鳳山中丞

樓船浮空向空泊坐對江樓詠孤鶴杲日晶晶目仍遠  
澄波森森心先廓大別曾聞神禹鑿洞庭彭蠡相聯絡  
夤緣七澤入溟海控引羣山俯飛閣飛閣西來千萬峰  
鈞天九奏敞龍宮虛傳雲樹書能達實少桃源路可通  
靈洲處處聞芳杜商舶時時乘便風風波歲月坐超忽  
回首朱顏成老翁我生蹇劣慚時彥踪跡天涯已強半

春草幽憂泣楚纍秋風歸思懷張翰  
支離歲月如轉蓬廿載斯樓已三見  
感喟長歌崔老篇登臨省識回僊面  
茲來景物尤絕奇江水江花淨如練  
報詩中丞興不淺更擬乘槎上霄漢

送姚惟寧出守

十月宜陽道風烟憶舊遊郡齋迎遠岫  
城郭帶寒流楚俗民多儉周田歲有秋  
居民忘帝力惟解頌邦侯

胡馬圖

墮地非凡種房星已動天千金辭大宛萬里刷幽燕首

宿花初滿關山月屢圓將軍功

闕

辛苦四蹄穿

恭陪郊祀

委佩祠官肅揚旂法駕來仗移天穆穆戟轉雪皚皚皮  
弁觀周禮甘泉憶漢才小臣慚職守隨例得叨陪

其二

陛戟森相向爐烟細不流慶雲團御蓋璧月抱圜丘吉  
協牲牢卜馨將秬鬯浮郊禋天子禮分獻及公侯

哀谷亭

聞道團營將前茅未進師居民坐塗炭揮淚望旌旛  
色烽烟外鳩聲谷雨時移家若飄梗誰暇念東菑

王子晉祠

杪秋天變陰落葉下高林不辨仙游處惟驚驛路深雲  
重鵠馭遠月暗鳳笙沈獨有緜山廟居人仰至今

同州道中

華嶽連馮翊黃圖別附庸長風開萬壑落日隱三峰野

望浮埃合鄉心遠樹重幽求今未得猶自抗塵容

用韻答張汝誠

臨關能送客投分亦緣君已負尋春約寧辭生夜分散  
銜欣對月酌酒慰停雲奈爾明朝路驛驅暫別羣

褒城道中

蒼莽晝難分巖嶮自昔聞嵒居低附谷磴道直披雲馬  
踏經寒雪鴉翻未夕曛西夷通蜀路因詫長卿文

由金州舟行至洵陽雜咏

窮源自嶓冢流作漢江清食貨通湘船方言雜楚聲林  
芳寒未改沙淨晚偏明便擬淮南卧前汀多芷蘅

聞笛

楊柳垂垂發何堪一笛風飄颻振虛壑颯沓入長空月  
暗闔山迴江迴澤國窮扁舟無寄託萬里奈漁翁

登法明寺毘盧閣

清晨訪法界高閣上毘盧獨鶴巢深樹幽泉瀉決渠開  
窗盡丘壑入寺極虛無坐愛香燈寂因懷禪誦徒

龍泉寺

哀牢漢南徼  
訝爾學西天  
鑿石開龍象  
穿山引梵泉  
胡奴長禮佛法  
侶共安禪暫暇  
來相訪難同靜者緣

宿寺作

暮止何年寺  
烟花翠且重  
山門下斜日  
香閣度遙鐘  
梵寂殘僧少  
雲深宿鳥慵  
飯依如有悟  
不寢對金容

立春前一日橫嶺舖見梅戲折一首

不羨鷺凡目  
寧辭澗壑濱  
古枝橫卧水  
香雪遠尋人  
冒

臘垂垂發迎春故故新徑須愁遽別邂逅且相親

立春過打牛坪

漢相留遺愛千年著驛名何緣立春日能過打牛坪  
籌策難迴運間闊不廢耕人心今易見成敗豈堪評

大龍道中

客行無易事涉水復驅車多露愁沾濕荒庭旋埽除風  
帷便茂樹雨飯足嘉蔬是處皆安適吾生豈願餘

月夜舟中聞笛

秋風日夕厲已覺露華清况有隣舟笛能傳江海情  
羯胡當北道倦客厭南征野水東流去餘音空月明

憫旱用夏大行韻

火雲騰旱魃潦水斷橫塘秋穀已無賴山花徒自香  
望中膚寸遠愁裏祝融長野老猶焦思喧喧雩社傍

浴溫泉

一月螳川路溫泉已亂流涓涓出地遠脉脉向人浮湛  
玉明膚色跳珠濺臂韁塵心方爾沃客病可全瘳

晚春經近郊別業漫賦示振之

地僻堪乘興，幽居足解嘲。  
驟看芳樹合，漸喜綠陰交。  
素壁明珠綴，青林暗鵲巢。  
此生隨意適，吾道豈如匏。

園居即事

首夏衡門裏，清波四望通。  
古槐垂密蔭，細草結幽叢。  
庭灑黃梅雨，簾鈎紫燕風。  
林堂多發興，興至復誰同。

雨後晚眺

小雨經簷盡，殘陽隱樹低。  
迎曛花氣合，向夕野容迷。  
寶

刹流雲外金塘去鳥西吾生江海意隨分此卑栖

輞川

秋晚橫塘路方舟轉港頻漁人心不極落日未收綸水宿無常處江行自作隣因悲倦游客遠道獨逡巡

癸未書警

羣盜連淮海傳聞逼近郊空村愁欲陷歸燕恐難巢敵愾誰能壯訛言衆易撓隣家小兒女荷擔念同胞

其二

卷四百五十六  
物態傷吾意流離滿道傍雨鳩頻逐婦風雁忽迷行自  
分惟溝壑何人且廟廊舊時阡陌在凝望返耕桑

宿獻花巖作

名山隔歲與心期古寺經過再賦詩僅僅解裝先藉草  
主僧留客旋烹葵泉鳴澗壑秋生駛樹隱房櫳日上遲  
豈獨有緣參法界同行吏部共襟期

其二

長廊卷幔得閒凭南國秋容望不勝香閣梵音傳遠磬

石幢寒影護懸燈山深疑有長生藥寺古應多入定僧  
人語忽然飄下界始知身在白雲層

送別王臨安

春風五馬出江城繡臆金腰刺史榮壯士買牛銷舊劒  
蠻兵驅象迓前旌武侯祠下焚香過判丈山頭露冕行  
暫去還來知不久底須回首望宸京

憑虛閣餞別劉元瑞校書湖南

禪林高閣散烟霏灌木陰陰燕子飛酌酒共憐為別易

乘桴誰謂遠遊非白蘋洲畔心先到綠草湖南路不違  
世事浮沈何足問願言長自保音徽

張潤之邀遊清江道院時與家弟同集

仙臺微雨及新秋竹漱涼風戀舊遊座有名香消白日  
路多瑤草別丹丘同行小謝詩尤健共醉麻姑意更酬  
悵別更逢真境好不堪乘夜渡淮流

定南公署小憩

解鞍聊爾謝馳驅千里王官奉使初宿草尚懷曾駐蹕

豐泥如卻欲行車山氓負耒春田散隣寺鳴鐘早飯餘  
休舍片時還覓句聖恩無地不寬舒

將從衢州陸行至常山

江鄉二月乍聞雷白霧黃雲慘不開石碓自春知水長  
布帆初飽覺風來旗亭喚客春嘗酒驛路懷人曉見梅  
世味已諳灘百折山行明日又千迴

次答顧開封

昔在南都文社裏道情長日對幽玄聲名豈藉金張薦

時輩爭傳屈宋賢總謂離羣堪白首共嗟為郡各經年  
相逢漫道還家樂生計何須負郭田

舟至臨清大風晦冥聞過客言穀亭盜賊之勢  
甚劇感而賦此

聞說王師北出燕山東羣盜故依然沙城風起塵如霧  
澤國春陰水作烟過客盡傳烽火警行人愁度谷亭船  
平原太守今誰是慷慨多慚石二千

渭南道中

厯厯晨光樹外明西來幾日又東行驪山自繞秦宮盡  
渭水空縈漢畤平豈有芳菲通舊苑祗驚禾黍暗高城  
憑誰指點興亡地歲晚令人百感生

登王孫亭望華嶽

華嶽遙瞻勢已雄河流入望更無窮羣山總出三峰下  
衆水同歸九曲中絕塞衣冠通上國行人車馬入新豐  
漢家陵邑依然在擬賦西都恐未工

入闕

秋入崤山見燒痕遺墟繚繞尚成村風塵古郡甘棠暗  
險阻重闕宿草繁人影隔河三晉路烟花橫塞五陵原  
觀兵不改周秦舊耀德仍知聖主尊

再過同官道中作

浮雲細細雨還晴客思車塵喜暫清山館重來應識面  
野花空好不知名長林樹轉迴征蓋遠戍烟消出候旌  
日落興闌猶信馬荒城夜火斷人行

秋日登老子說經臺臺下有道德經石刻并手

植柏在焉感而賦此

伯陽仙去有高臺  
紫氣銷沈望不回  
樓觀俯看秋色裏  
函闕背指暮雲隈  
岩前種柏飄玄潤  
石上翻經暗古苔  
問禮誰爭宣父長  
慚予千載偶能來

奉贈對山康子之作

滸西花柳卜居新  
梁間燕泥生紫蘋  
病輶圖書緣在告  
興來魚鳥得長親  
浮雲漠漠秦川夕  
灌木陰陰武水春  
賴有同時呂涇野  
相將歲晚結行隣

固原道中

旅雁將歸未黍收邊衣八月總羊裘千山搖落無芳草  
萬壑奔騰自急流探騎弓刀揚遠日戍樓笳鼓動高秋  
獨持文教來幽塞更覽戎機答壯遊

六盤山

西北六盤山切雲一盤千折動星文穿林列騎交愁入  
峭壁哀猿近厭聞隴樹遙連邊塞盡秦闊中斷渭流分  
清秋忽報烽烟警落日猶過虎豹羣

書驛壁

羌隴西來秋事非  
長安東望渺庭闈  
十年故國悲遊子  
九月寒砧感授衣  
返照入林戎馬急  
陰雲接地雁鴻稀  
莫愁絕塞終難據  
聞道中原未解圍

晚下摩雲嶺

曉發臯蘭望絕岑  
馬蹄平步入峩峩  
林藏積雪地含潤  
山渺素秋天變陰  
滿目烟霏窺幻化  
四時嵒壑助蕭森  
黃河西畔華夷隔  
臨眺徒傷萬古心

臨洮道中

馬度洮河西復東重岡絕巘渺烟空寥帷更喜看晴雪  
挾纊仍愁犯朔風荏苒物華行役久支離病體歲年窮  
欲從隴右窺全蜀擬過徽陽入漢中

黃鶴樓讌集次答李子承裕之作

把酒江樓坐不歸高情向我重相違路通溟海人南去  
山近衡陽雁北飛避世每思詹尹卜解嘲誰訝予雲非  
相將更上層梯立閒看浮雲蔽晚暉

桃川懷古

猶有桃花照此川更無人泛武陵船泉分洞口僊凡隔  
地遠人間日月偏未羨入山真不老曾聞避世可稱賢  
逍遙物外平生志悵望丹丘已灑然

秋興

金陵王氣即非遙龍起濠梁表聖朝御道北來瞻日  
月神宮東望切雲霄花明天闕春遊寺柳暗秦淮夜度  
橋陶謝並驅知忝竊別來人事轉蕭條

其二

秣陵東下廣陵船一體繁華地接連  
遂有吹簫並僂侶還同拾翠亂蟬娟  
風飄睡鴨沈檀火日傍驛鰣錦繡鶼  
豈是蕪城君不見叅軍辭賦莫真傳

羅舊驛壁次王子伯安之什

辰山沅水瘴溪頭坐愛芳蓀賦倦遊翠竹含風霜後改  
青林背日晚來幽離心已隔洞庭渚歸夢時過鸚鵡洲  
漫訝入滇身萬里昆明池館漢神州

東坡月潭寺雲泉閣小憩用壁間韻

月潭寺下息塵踪，雲泉閣中看灑穹。蘿陰蒙翳見樵逕，  
石壁蟲兀開花宮。俯瞰丹霄下，飛鳥倒聽玉溜鳴。寒松擬將招隱托衰謝，夷夏兵戈愁未通。

平越分司夜坐雨不絕

鳴泉踈雨下高林，此夕天涯感慨心。箐洞夷獠行處有，  
邊城鼓角坐來深。堂空風入傳虛警，山坼雲開散積陰。  
謾引壺觴看劔佩，壯懷依舊未銷沈。

浪滄江

千尋鐵鎖貫長橋  
積翠浮天萬壑遙  
人向中流看砥柱  
路從平地入峩峯  
未論文教開荒服  
已見夷王欵聖朝  
鳥語花明迎使節  
浪滄江上瘴全消

夜飲俞國昌宅次華大叢文光韻

城闕風烟馬首東  
一樽今夕偶能同  
衝泥未怯銀鞍險  
照夜翻憐蠟炬紅  
遂有親朋連海宇  
還將意氣薄雲空  
天涯忽漫匆匆別  
莫遣音書滯便鴻

遊金山

江坼峰尖臺殿愁天開梵境鎮中流凌風舟楫坐超忽  
抱日龜鼈時出遊塔刦俯空瞻麗象鐘幢接地動高丘  
卻探靈蹟窮三島坐愛閒雲出五洲

龔家渡即事

白沙清瀨繞江村槿葉藤花護竹門餉婦壺漿依畝畝  
野翁蓬跣對兒孫雨肥禾稼秋堪飽俗尚陶匏禮不繁  
安得卜居同栗里未須多事覓桃源

曉發宜陽暑雨新霽晚宿宣風館次韻王陽明

一首

絕壁雲開過雨痕緣江漲湧碧流渾溪田決溜疑無逕  
竹嶼籠烟別有村暑氣趨晴威更烈客程當午思饒昏  
扶持病體供驅使未羨江淹賦別魂

登宜梁城樓

城是風高不耐衣飛樓縹渺動晴輝山連平野來無盡  
樹引寒流去漸微東望江淮舟楫遠北征車馬簡書稀

未嗟筋力思滇海  
羞對漁樵說采薇

大駕東巡野語

聞說天王西狩頻翠華  
今日又東巡泰山重被登上封頌  
梁父親承羽獵塵曉日霏烟開帳殿  
朔風寒雨暗楓宸  
江都十月花零落  
莫遣龍舟望幸新

次韻答振之弟報庭下桂花盛開

東郊雲物繞平田  
自分歸耕卒歲年  
問字每過携酒客  
泛湖時上打魚船  
行依流水心同靜  
坐對遙空思入玄

莫訝小山花事好已留歡賞寄秋前

夜坐聞新雁懷遠作

澤國秋深烟水饒依依涼月霽層霄一聲新雁已蕭瑟  
萬里長空方寂寥漸覺井梧團玉露忽驚園柳脆芳條  
閒居見爾應愁思況是邊闕征戎遙

小至

仲冬小至氣氤氳雪後川原路始分佳節思親倍惆悵  
野人携酒意殷勤灰心未解迴溫律霜鬢仍愁對朔雲

抱病懷憂闕擁塞雍門吟苦不堪聞

次韻奉答東橋

張衡未老賦歸田  
斬地燒菑理術阡  
世路風波甘息足  
貧家衣食願逢年  
窗臨茂樹清陰直  
門對斜川小逕偏  
愛逐西隣沮澗飲巾車  
乘醉穩如船

次韻遊狼山

千古狼山雄此邦  
臨高真遣夙心降  
楚天風雨東連海  
吳地烟花北過江  
巖際驚濤喧客枕  
竹間飛澗灑僧窗

因參法界金光滿更禮祇園寶樹雙

六月十五日夜大雨病中作

六月望日旱苦久一雨中宵便灑然  
疎簾小閣虛無裏  
翠篠微風竚窈前靜聽水蛙喧  
夜枕欣聞隣叟說秋田  
稍須涼冷身應健飽飯行歌擊壤篇

田居秋水暴至林莽委翳昏莫能辨偶然作一首  
徑是花繁入暝愁舊溪經眼漭難求青林背水藏蛟室  
紅蓼緣隄胥客舟近舍尚迷揚子宅臨高始識邵平丘

人生身世皆如幻漫詫桃源說幻遊

陪喬侍御自白鹿洞再訪開先寺

鹿洞意已愜龍池渴未消還隨持節使重過濯纓橋涉  
水涼生襪捫蘿翠染綃行行渾不倦去去即非遙路轉  
山交股峰迴草沒腰險中頻却馬狹處僅容軺異迹多  
存古幽期自遠置石眠聞晉史臺隱記梁昭泉似中天  
落雲疑萬壑搖南風清浹暖西日下岑寥選勝欣初霽  
探奇遂詰朝浮嵐頻近眼五老若為招

自上饒至弋陽舟中雜言

驛路千山裏江門二月天人便春服薄花愛晚風鮮焜  
焜波搖月飄飄柳帶烟紫鰣騎廣陌黃爵敗良田坐理  
殘書角行看古樹顛興來還獨酌醉後只高眠健質何  
妨遠中流不用牽平生快意事幾度下灘船

和二泉登石屏望廬山韻

落日廬山路無緣躡上峰東林何處是烟外但聞鐘

滇中懷歸

連巖望不極惟見鳥飛還鄉心落何處日沒禹同山

渡漢江

鶴鵠鷗鴻繞船飛翠篠青杉照晚暉無限好懷消不盡

江南風景夢中歸

送劉侍御

巴東涼月夜何其起視明星亦不遲兩㟁落梅羌笛裏  
故園今夕是歸期

湘中雜興

春草千里碧沈沈蒼梧雲昏湘水深此中自古行人怨  
鷓鴣雙啼斑竹林

石倉歷代詩選卷四百五十六

欽定四庫全書

石倉歷代詩選卷四百五十七

明 曹學佺 編

明詩次集九十一

康海

寶穡堂作

明農謝昌宦良覩羨予征敦義昔所重况此骨肉情嗣  
歲節物改朱陽喜開晴感今嘆伊昔發車臨廣庭所期

德音邁永修三徑盟

其二

平生尚超曠結廬武亭川本非青雲姿竟作金闈愆托  
交三十載孤抱亦何淵邈觀古昔事彌想梁甫篇感此  
發深省誓以俟餘年

同用昭自華州南郭往西谿作

愛爾草堂靜驅車同討尋南郊更崎嶇春溪多綠陰蒲  
荷漸將徧松竹已成林感慨宿昔意相對靜塵心悠悠

日西邁渚禽揚妙音即此興已極何必東山岑

問驛使

汝自馬村來汪濊定何許向經袁村西四顧已如渚河水沒馬腹奔潦幾時住愁都天際雲癡癡若膏肓白帝司斂藏底事輒乖矩苟無念此人亦當憫禾黍

中夜

猗猗厨東楮得雨即成響旅人憂思長感之亦悽愴滂水不殺湍積潦百穀漲舉室若楚囚展轉不成況賓客

雖見臨笑語亦超曠豈無尊俎陳薄言那得放

宿渭源思

歲序洎中夏予征當雨餘炎溽既不騁清風時惠如業  
業終南山潺潺豐鄆渠雲霞氣綿幕佳樹蔭交舒斜日  
青翠明百志一何攄方啟讼樾想忽至田父居展慰出  
名酒下榻坐前除徘徊月東出欲罷復趨趙浩歌遲明  
發予乃蒞征車

郭廟答希宋諸公

芳春豈不惜駕言趨華山兒女事如此詎許垂老閒感  
君遠相餞捐杯淚如潛雖有絲竹奏那能開苦顏握手  
重猶豫悵望綠草間節物不相待流年逝潺湲

其二

欲行復中止臨駕忽心摧滸西花無數予歸當漸開君  
若有遊思予亦富新醅或擢漳水波或眺沂東臺不敢  
竟月醉昔人安在哉

於條山絕頂下瞇解梁

升嶠覩羣岫烟雲互明滅直北看解梁但見池水冽憶  
當弱冠時茲川已三閱其南望中條蒼翠萬重揭徒動  
登覽懷未遂討探契繫自殽函來不謂遽超絕河山傷  
魏濬欽明想堯烈昌代皇化隆遺風尚昭晰耕鑿古未  
渝勤儉今豈輟悠悠興永嘆勗茲在時哲

贈寒泉中尉

澄瑩絕纖繫一泓瀉千里寒月搖輕波山光徹波底魚  
鷁不敢遊虬龍得旛旂轉盼清素心浥飲滌凡鄙平生

畏炎蒸見之輒中喜願言保真寂勿以塵氛浼

贈灤江公

輶車戒晨發循此東南域握手立斯須徘徊意安極念子有幽思別言心如織昔為同生蘭今為特飛翼人生易悲樂良晤前所恤黃塵暗清渭對飧安可食嗟嗟君子心遐眺在燕北

其二

關輔比多事欽公能自綏養寇蓋往失弭亂豈今訛崇

貨獨卑吏飾貌忘遠規公來屏笑色事至任安危素衷  
物莫況逸駕古所窺雖有麝裘誘倏動赤鳥悲所以丈  
夫行不與流俗隨

其三

披叢憇軒下撫卷輒中慚笑我伎微薄無能續高駿緬  
思雄詠侈一發連數函咀嚼味逾雋詠嘆誠所耽贈瑤  
似劉傅酬德悵盧參清風溢將遠鄙志揆豈堪那知邂  
逅際復送旌旆南

其四

公歸只信宿予餞苦淹後耿耿徒憂傷役役定誰咎憶  
昔承明直相企亦已厚公念薄綺紈予質等蒲柳雖能  
慎初服終恐易衰朽樂遊觀五陵氣候稍非舊嘆息君  
子陳宵興望南斗

飲酒

獨居意靡暢行吟心更傷晨發望原際佳氣鬱相望恨  
無同懷人躍馬陟嶮岡徘徊日忽暮感嘆琴屢張山妻

出美酒斟酌為君嘗三觴起孤抱百憂忽若忘丈夫生  
世間磊落斯所臧何須久鬱鬱自如陌上桑

東原晚歸

斜陽下平林予駕及巖嶂落花夾路飛蒼流復蕩漾孤  
往多曠情遨覽起高唱入城生暝色登堂尚微亮兒童  
喜我歸道遙壽家釀

整籍

三年困人事何曾理書帙鳥鼠白晝遙入門忽首疾架

閣具傾覆點簡切中沐凌晨趣灑掃整頓倏終日種類既品題編簡復齊一不但几案清幸靡萬一失焚香生望餘儼然成靜室平生風雅情殊以乖蹇室追惟感嘆生端坐還羞愧何如谿上翁翩翩獨閒逸

於游西贈別明叔

三月詣茲曲八月今始復結轡送君歸投壺泛醴釀風清懷抱優暑退涼氣淑我歌苦不長聊以詠幽獨荒徑殘草多空堂蛛網覆豈無灑掃資紛糾在塵俗

沂東眺望

層崖若長函靈異特中秘迴合上沂岐噴薄下臨渭壤沃草木榮氣滋苔蘚翠蒼烟縈紫房白鷺眠芳蓬木杪見南山岸嶧若天墮時復生白雲觀之使心怡山居三十年筋力半銷瘁徒羨古人遊孰契來日事所以慕良覩冀欲畢微志喚妓理瑤琴呼童捧兕觴感歎發浩蕩悠悠起吟思後會如可諧謂續城南例

經漆村覽有卽古蹟

我聞昔人言此即漢漆縣其東有邵城草木殊葱蒨終  
南當面朝清渭過如練直北倚黃山逶迤控周甸前望  
松檜場知是何王殿王蹟日以微氣色或隱見西南慶  
善宮齋當漆村面勝地遷變多往躅審彌眩繫自虞夏  
來百祥具茲奠地靈昔所庇諦此竊中羨

十月十日

此日是兒生今年兒已死往昔具酒筵歡慶溢閭里素  
帷當中庭淒風蕩旌軛我淚倏若推兒音恍在耳彷彿

六旬人何意復丁此莊生逍遙篇亦具生死理哀哉橋梓心千古詎能毀含痛卧茅茨不知晝移晷

寄王公爵

予本江海人清風冠今昔揮鞭遊宛洛揚帆窺楚澤念予山林居慷慨意不索遺我南華篇詎羨竟尸璧何時重握手共坐君山石

再浴

凌晨復臨泉決旦滌豈息玄靈理難測爽邃屢堪即仙

源自鴻濛那許后土蝕蕩漾含炎精滴洄印天色游泳  
愜情性修飾鮮工力尚計輸夏租稍具十夫食

嵒坡小酌

宿志愛山水竭來尋澗源旭日照蒼翠恍惚遊石門激  
濤齧怒石終日聞雷誼策杖坐嵒坡芳草如錦墩長嘯  
振天宇小酌興彌煩醉憇聽樵唱悠悠不可言

尹之先畫竹

虛堂挂翠筠玉濤滿壁起知君徹骨清志意特欣此興

劇湏我題予好亦若爾回視桃李姿穠芳胡足齒

自五月朔來偶疾肺脾兩月弗瘳間值栗喪悲

痛呻吟閉戶太息而已七月之望偶攜舍弟

與惠逸人過滸西則韓藍田周蓋丞同轡見

訪因成小詩以志予抱兼示諸子

積痛無曠襟殊怨殞遙思徒抱豪放恣竟累兒女事造  
物苦戲人皇穹降乖祟卧病動彌月薰心恒似寐初秋  
歇炎蒸藍輿歷幽邃強顏發短歌撫膺泣雙淚感君來

問予笑我乏遠致太息苟自裁引領忽成醉

邯鄲美人歌

蘭氏小姬名鳳笙  
邯鄲美人獨擅名  
等閑一見萬金賤  
何況逍遙翡翠屏  
精神婉娈性情適  
自恨生身楊柳陌  
陌上羞看遊冶郎  
鏡中愁作當看碧  
學得秦箏不肯彈  
却將針指湊齊紈  
鴛鴦刺就腸先斷  
掩却銀床獨自嘆

從軍行

烽火西傳番騎來  
天王按劍雪山摧  
將軍裂眦奮一戰

旌旗蔽日雲氣迴  
朔風獵獵天山遠  
層冰齧石交河斷  
材官爭取可汗頭  
諸君肯放明王返  
功成不日詔承明  
賞賜先推飛騎營  
驍騰俱封二千戶  
錦衣朱纓義氣橫  
聲名絡繹傳鄉邑  
甲第崢嶸開上京  
回頭笑殺魯連子  
白髮龍鍾空一生

雲將軍畫水歌

誰將此水挂堂壁  
春風微動波濤鳴  
光明閃爍對天日  
浩蕩不息朝東傾  
西閭將軍妙齡客  
英武桓桓獨心悅

他日龍荒破敵時看爾風雲千載色

十九日即事

養雛自恨羽翼短翼長飛去豈思返老鳥目斷東南枝  
白日青天一何遠尾禿唇焦徒自啼啼殺老鳥雛詎知  
願雛養雛還勝雛慎勿醒覬如老鳥

有所思

有所思兮乃在天一方徘徊不可見反復令心傷秋雨  
霏霏庭院空思逢君兮君莫逢流蘇羅帶那復展墻下

梧桐生悲風

聽韓景文彈琵琶

關西子弟彈琵琶  
武氏成名已三世  
勝絕忠老傳授稀  
尚宵已近六十二  
要妙誓不教女兒  
精微安肯輸同事  
武功少年韓景文  
杳撥檀槽酷能似  
然打鈎挑色色精  
調停布置俱神異  
大曲渾涵小曲嫣  
羣官衆調無窺避  
始知絕藝本天成  
誰云末技非難致  
清秋八月賓客來  
尊俎未列管絃開  
立酌停歌兩三疋  
此聲一出人盡駭

倉庚微吟柔桑底凍竹乍裂淇園隈遊蜂逐萼遠不歇  
曲嶺回鑾繁更催千山夜落九天雨空谷朝驚三月雷  
悠揚拂掉轉相勝開喝遽互清且哀鉄騎橫來長樂坂  
神女坐對陽雲臺開庭翻絮去閃爍絕壑墮石來磈礧  
曲曲宛轉意態別三百四十猶往回憶昔京華公宴日  
教坊子弟紛紛出三院都輸張學彈數年頗會聲音悉  
以此常誇武氏高汝今操縱如畫一夜深客醉席屢更  
四座嗟咨未忍行曲終吏奏不知旦戶外驚聞繁雀鳴

戲介夫

張家酒惡吳酒良使者兩索皆見妨好雨豈知主人苦  
暖泉眼底成瀟湘躍馬欲行還自止不憶此行忽如此  
歌舞雖佳酒不堪安用嘵嘵聒雙耳

青門歌

人生會少離別多握手送君君若何青門芳草四瀰瀰  
蒼渭素滻生愁波今日送君歸何日望君至憐君磊落  
人紛華亦何事長亭山色遠近閑與君酌酒願君醉此

去當為遠別離離愁漠漠心如碎楊柳青青知為誰鳴  
泉日日摧歸騎歌者且勿停行者且暫憇灞陵橋上西  
日馳朱顏那許人恒駐君才特達近所稀許身當作青  
雲器况茲先後被恩私閥閱崎嶇羣貴從來將相出  
名家渟魚轍鮒空相覬願君拂拭星斗文莫使塵氛等  
閑蔽離別雖難兒女情行藏頗涉英雄事酒酣長揖各  
自歸明日相思渺無際

玉女泉

玉女泉西有石室水落龍潭波濶濶笑殺東京馬仲長  
駐此何為忽飄逸平生絳帳縣絲竹數十蟻晝列華屋  
泉頭習習秋風生不見當時環珮聲古來大美小難妬

愛爾千年文學名

疆場村

渭南西北疆場村無數桃花開華門高陵到此已卓午  
滿路風沙愁斷魂去縣尚有三十里僕夫噭噭默相語  
地慘天悲行路難豈知主人心更苦五字先拚數莖鬚

千金不及步兵厨  
太微處士興慪爾  
高風常候城西隅  
何時身坐少陵洞  
共渠細倒水晶壺

題王秀才牡丹圖

何日到吾家  
牡丹應著花  
開圖一見興已發  
遙似當年宴  
紫霞雕欄不受春  
風抑綠葉紅蕤舞  
風力終日迴旋  
不肯休  
根株苦被丹青匿  
遠路遭洄銷客心  
夢魂惟在草堂陰  
牡丹吾語汝  
三月八日始穀雨

閻家渡呂王二君作

美人約我遊湯泉  
明日同之清渭川  
日中我抵閭家渡  
不見美人心自憐  
嘉興太守清狂客  
肯使相逢倉卒還  
天昏雲暗古道澁  
思君不來空佇立  
金銜白馬中夜嘶  
青尊碧碗嗟何及  
達旦不寐芳意衰  
空庭露下蒼苔濕  
明星漸低人漸喧  
起來翹首望西原  
原頭不見車馬下  
戶外空聞鴉鵲繁

王總制維綱凱還歌

秋風清秋草黃  
胡馬橫飛澗河梁  
材官奮擊胡馬盡  
幕

下生致月氏王憶昔先皇全盛時六龍結駕親出師朔  
方健兒佩金虎人人思奪胡馬騎胡來趙趙其旋如雷  
萬夫發弩不能一摧豈知神武本不殺喜功不至胡為  
哉吾聞天子之守在四夷爪牙之士皆熊羆朝中但有  
荆山老莫怕邊風疊鼓鼙

春暮嘆

今日復春暮芳華能幾時今人不見昔人樂今人之樂  
昔豈知嵒泉沸沸沼翠微我坐溪頭看絮飛輕颺依約

杳無定明日相逢安可知去年謾作華山客對食不能  
心自惜此時空作山中人閑情人事仍相迎苦憶同袍  
三四君即有稀聲誰更聞不如殺鷄飲美酒醉時遙望

南山雲

答太微滸西行

結廬事場藿徒欲食其力世人那能知謂我謝親曨平  
生無遐思長往將安極種樹森森高挿天栽花謾喜多  
穠色苟使徜徉終此身敢向長天振雙翼諸君義氣如

古人訪予幽壑滯芳春興豪那憚三百里筆落欲掃千  
人軍君和紫芝曲我草北山文層臺日夕雲霞動嘯弄  
清波漾綵紋盧女當絃歌白紵飛花飄上石榴裙於時  
君醉我起舞空林鶯燕如相語眼底韶華取次休人生  
適意能幾許往者閒遊翰墨場羣公以我似班揚雕蟲  
徒使為身累安知山林歲月有此長我家桑落近所少  
與君斟酌各千觴安石東山已塵蹟後人詎識吾曹狂  
君不見葛洪苦慕不死藥從今紅顏坐消燦長生有法

遇者難不如逢暇先行樂逝水無迴波層魚無縱躍徘徊歌汝許西行却把空鞭笑東郭

寄李宗易

滸西多逸興日日白鷗來種竹忽遮屋看山豈用臺有時跳舞鶴終夜醉新醅何為蘇門客招邀不可迴

送郭玉西還

病酒動經月君來慰我思青冥日淫雨小閣憶當時世重梁州舞予嫌子夜詞還家逢女伴不可鬪蛾眉

答明叔孟獨二子之贈

寂寞揚雲舍春風二妙過新詩題素壁逸興入烟蘿杯  
帶寒潭淺山臨夕照多尚能陪杖屢同坐汎東莎

喜仲默至

二月高陵縣逢君發慶陽十年方邂逅百歲幾徜徉詞  
賦名湏久安危望已長青尊今夜月好醉滌西堂

憶牛頭寺

首夏東遊華因過御宿西稍尋幽處覽深入故人栖水

竹都堪畫雲烟總合題始知常杜曲尺五逼天齊

對客

絲竹憐吾懶尊罍待汝來片雲霄漢沒叢菊小籬開積雨難相過當歌莫謾迴請看秋草色黃滿建章臺

對月

明日重陽節霜華又一年薄遊慚貰酒高會即登山明月催歸興新詩待綺筵奚童識吾志先具泛溪船

次張閣夫見過之作

獨好中林隱因家清渭川園開溪盡處山合水西邊曲  
藝明時棄長歌稚子傳已深踈曠志不是欲遊仙

滻西夜歸

暝色暗川原藍輿返賁園野花迎夕露新月照秋軒醉  
覺綸巾岸吟憐鳥語喧匆匆百年裏佳節幾扳援

行次灞橋

自笑客行久悠悠臨灞川感時徒極目遣興謾成篇氣  
槩因周勝山河入雍偏五陵佳處望大約漸非前

望鄂

客謝鄧橋道逶迤紫閣陰雲霞餘夕照花柳暗春林燈  
火城中出星河望裏沈不知王逸少何處賞偏深

經暖泉宅

二曲交遊客如君信不多幾時達笑語荒塚已烟蘿却  
望題詩處其如灑淚何謾看憂樂事千古一蹉跎

梵覺

梵覺蛩吟夕看雲雨腳收此時真可惜昨夜不勝愁秉

燭看兒女呼童貰酒籌  
明年冬十月仍放戴達舟

渭南逢楊靜修韓秀夫孟望之三君子

詣華情空切相過意已深  
那知百年裏又此一沾襟  
兒女方粗了存亡忽見尋  
吾生何日定對酒若為心

臨川寺與鄆令王念覺夜坐

多君省春野逢我遇仙宮  
共宿臨川寺徘徊及夜中  
絃歌興漢邑恭儉即邠風  
更聽憂時論何慙砥柱功

栗為許徵萬柳庄集夜坐率爾有懷

汝向名園去佳遊興若何柳溪湏對月花塢且停歌不  
寐杯空寫微吟思轉多老來心數仄徙倚立庭柯

靈寶客邸逢慎之

客滯燕臺久春深始到家異鄉驚見汝歸思渺無涯但  
酌弘農酒休言杜曲花我來應首夏知剩幾枝斜

靜林寺別張秋官康甫張侍御運夫

已怯春餘熱那堪送我行湖光迴白鷺節候入朱明小  
徑風沙合層臺烟霧橫遙看靜林寺似可學無生

徵雨獨坐憶德充

雨中無客至獨坐試徵吟忽見桃花發不知春事深  
天紅浮綺席佳氣轉芳林明日同沽酒長歌眺碧岑

江景

昔經涑湖水今憶武昌遊萬艇雲中下三江天際流漁  
歌蓮葉浦鴈度夕陽樓應笑浮名客勞勞幾日休

巖洞

巖峒昔年好亭亭嘉樹圍春風惟綠草幽逕帶殘暉卜

築心逾切遊遨願不違微吟天欲暮幽感逐雲飛

真空寺

拂霧尋山寺籃輿上轉輕曉雲生石細旭日映嵒明梵  
磬遙空出天花夾路迎何湏似摩詰方是學無生

長安別雲夢侍御

我東遊華山逢子長安陌喜見楊柳青共坐搴芳碧桑  
落出名家斟酌渺今昔道合義二難情親欲千石夕烟  
生遠林前旌指玄壁握手難久留知君有佳適明年報

天子再訂仙掌席

華州張子梅花亭小酌

梅花亭上午陰涼芍藥欄邊春晝長霧鬢雲鬟何處女  
羅衣金鉢坐來香嬌歌欲遣行雲住妙舞空凝乳燕狂  
笑殺西溪能愛客滿缸時釀爵金漿

憶昔

憶昔承明侍從朝先皇端拱似神堯萬家簫鼓傳雙闕  
三殿風雲護九韶劍珮緩歸青瑣夕蠻夷通款越裳遙

可憐湖上龍飛後人事官曹漸寂寥

長安早發懷歌湖

既至長安不見君風流徒頌沈休文誰知兒女事粗了  
復有艱虞乘所聞酷暑未憂中道熱涼陰空望北山雲  
可能公子開涓滴謾醉東池到夕曛

除夜

歲暮開樽對竹扉  
煖風吹座亦微微  
却看稚子婆娑態  
不用常娘嫋嫋衣  
海上靈丹消息近  
天涯朋輩信音稀

獨憐彭麓山陰叟濁酒酣歌興不違

二月初九日過滻西看牡丹

今日滻西開牡丹  
攜兒漉酒坐相看  
穠花自識春風好  
接葉休為夜雨殘  
深夜紫泥巢翡翠  
層樓朱檻宿鴉鸞  
衰容任遣韶華逼  
幽抱常教酩酊寬

西園眺望

五月不來溪上遊  
溪雲猶自伴溪流  
雖非給事茱萸汎  
絕勝郎官鸚鵡洲  
半頃稻花迷浴鷺  
萬株垂柳報新秋

何當更挈同心者小酌微吟盡日留

試筆

石室棲遲近十年老人虛擬洞中仙平生畏暑非耽寂  
老去便幽反類禪霜效小桃猶有箇風翻細草若生烟  
襟懷落拓原無為祇愧當時抱甕賢

昔往

昔往何悠悠今來亦矯矯綠樹雲外多紅顏坐中老

題畫

長裾澹容與散步蒼松下不是鹿門人何似棲棲者

葡萄架

綠苞雖未折清陰已堪想徘徊望東山依依明月上

飲酒樂

碧枕金波窈窕歌綠雲紅日醉顏酡西風白石雙巖下  
北鴈清霜奈夜何

其二

飲酒無多樂亦多野花巖鳥意婆娑朱纓白馬青蓮蓋

不及谿田卧綠莎

彭麓山房漫興

黑水波濤萬尺懸太行王屋詎能先從今杖履朝朝坐  
坐看青山下紫烟

寄獻吉

炎威赫赫汗如泉秦女彈箏乘曙天願逐南風作雲雨  
却令涼思到君前

扶風道中

雍原東去徹咸陽渭水西來觸太行陵谷盡歸明坂籍  
衣冠不見漢文章

其二

夕陽隱隱抱孤村知是何王晾馬原龍種自隨形蓋去  
人烟常傍廡門繁

示德克

昨日予從沂上歸滿天花柳拂征衣却思春色無多許  
好謾相將歷翠微

二月九日同德充一於杏花亭集甥子俱在

兒女闊心有底忙平生幽興動成妨莫教逼近荼蘼節

春事從頭却許長

寄芝山右長史

芝山風致絕堪憐老我當時望若仙秋暮春分盟又改

石門空掃薜蘿烟

石倉歷代詩選卷四百五十七